

Na osnovu člana 62. stav 2. i člana 64. stav 2. Zakona o dopunskim pravima boraca-branitelja Bosne i Hercegovine ("Službene novine Kantona Sarajevo", br. 45/12 - Prečišćen tekst, 26/14, 46/17, 18/19, 20/20 i 24/20 - Ispravka), ministar za boračka pitanja Kantona Sarajevo donosi

**PRAVILNIK
ZA UTVRĐIVANJE PRAVA NA DODJELU JEDNOKRATNE NOVČANE POMOĆI I
PRAVA NA OBEZBJEĐENJE OGRJEVA**

I – OSNOVNE ODREDBE

**Član 1.
(Osnovne odredbe)**

Ovim pravilnikom uređuju se: rodna neutralnost izraza, korisnici i vidovi prava, postupak ostvarivanja prava, podnošenje zahtjeva, rok važenja podnesenog zahtjeva, organ odlučivanja, uvjeti za plaćanje troškova vanrednog školovanja, posebni uvjeti za plaćanje troškova polaganja dopunskih i razrednih ispita, kriteriji za plaćanje troškova vanrednog školovanja, posebni uvjeti za plaćanje troškova vanrednog, redovnog samofinansirajućeg i paralelnog studija na višim i visokoškolskim obrazovnim ustanovama i izuzeci u ostvarivanju ovog prava, obavezna dokumentacija za dodjelu jednokratne pomoći za plaćanje troškova vanrednog školovanja, posebni uvjeti za plaćanje troškova postdiplomskog studija i odbrane doktorske disertacije i izuzeci u ostvarivanju ovog prava, prednost pri rješavanju zahtjeva, refundacija troškova školovanja, uvjeti za jednokratnu pomoć u vidu prehrambenih i higijenskih artikala, odobravanje jednokratne pomoći u vidu prehrambenih i higijenskih artikala, obavezna dokumentacija i kriteriji za dodjelu pomoći u vidu prehrambenih i higijenskih artikala, opći i posebni uvjeti za ostvarivanje jednokratne novčane pomoći za rješavanje drugih socijalnih potreba, kriteriji i obavezna dokumentacija za ostvarivanje jednokratne novčane pomoći, visina jednokratne novčane pomoći, uvjeti za ostvarivanje jednokratne novčane pomoći za plaćanje troškova stanarine, posebni uvjeti za plaćanje troškova stanarine, kriteriji za plaćanje troškova stanarine, visina pomoći za plaćanje troškova stanarine, obavezna dokumentacija za plaćanje troškova stanarine, uvjeti za pružanje jednokratne pomoći u plaćanju troškova u procesu odbrane, postupak za ostvarivanje jednokratne pomoći u plaćanju troškova u procesu odbrane, lica koja ne mogu ostvariti jednokratnu pomoć u plaćanju troškova u procesu odbrane, visina jednokratne pomoći u plaćanju troškova u procesu odbrane i izvještavanje i pravo na obezbjeđenje ogrjeva.

**Član 2.
(Rodna neutralnost izraza)**

Izrazi koji se koriste u ovom pravilniku, a imaju rodno značenje koriste se neutralno i odnose se jednako na muški i ženski rod.

**Član 3.
(Korisnici i vidovi prava)**

Pravo na dodjelu jednokratne novčane pomoći mogu ostvariti lica iz člana 1. Zakona o dopunskim pravima boraca-branitelja Bosne i Hercegovine ("Službene novine Kantona Sarajevo", br. 45/12 - Prečišćen tekst, 26/14, 46/17, 18/19, 20/20 i 24/20-Ispravka), (u

daljnjem tekstu: Zakon) i to u vidu:

- a) plaćanja troškova vanrednog školovanja i paralelnog samofinansirajućeg;
- b) dodjele prehrambenih i higijenskih artikala;
- c) dodjele novčanih sredstava za rješavanje drugih socijalnih potreba;
- d) plaćanja troškova stanarine;
- e) pružanje sve vrste pomoći osumnjičenim i optuženim bivšim pripadnicima Armije BiH u predmetima ratnih zločina do pravosnažnosti presude, kao i članovima njihovih porodica (u daljnjem tekstu: jednokratna pomoć u plaćanju troškova u procesu odbrane);
- f) obezbjeđenja ogrjeva.

II – POSTUPAK OSTVARIVANJA PRAVA

Član 4. (Postupak ostvarivanja prava)

(1) Ministarstvo za boračka pitanja Kantona Sarajevo (u daljnjem tekstu: Ministarstvo) dužno je svake godine objaviti javni poziv za ostvarivanje ovih prava, kao i javni poziv za odabir firmi za dodjelu prehrambenih i higijenskih artikala, kao i obezbjeđenja ogrjeva u skladu sa propisima iz oblasti javnih nabavki.

(2) Za ostvarivanje prava iz člana 3. tačka b) i f) ovog pravilnika raspisuje se poseban Javni poziv sa utvrđivanjem roka trajanja za podnošenje zahtjeva.

Član 5. (Podnošenje zahtjeva na propisanim obrascima)

Lica koja imaju pravo na ostvarivanje prava na dodjelu jednokratne novčane pomoći podnose zahtjev na posebnim obrascima, koje priprema Ministarstvo svake godine prema zahtjevima potreba dokazne dokumentacije. U ovim obrascima navedena je potrebna dokumentacija koju je podnosioc zahtjeva dužan priložiti uz isti.

Član 6. (Rok važenja podnesenog zahtjeva)

(1) Podneseni zahtjev važi samo za budžetsku godinu u kojoj je zahtjev podnijet.

(2) Ukoliko se po navedenom zahtjevu ne ostvari pravo na dodjelu jednokratne novčane pomoći, podnosiocu zahtjeva je Ministarstvo dužno uputiti pismeni odgovor do kraja budžetske godine.

(3) Svake budžetske godine utvrđuje se visina novčanih sredstava za ove namjene.

Član 7. (Organ odlučivanja)

(1) O dodjeli i visini sredstava jednokratnih novčanih pomoći iz člana 3. ovog pravilnika odlučuje ministar za boračka pitanja (u daljnjem tekstu: ministar) na prijedlog pomoćnika ministra u Sektoru za boračko-invalidsku zaštitu (u daljnjem tekstu: pomoćnik ministra), izuzev prava iz tačke c) i e), u kojima o dodjeli i visini sredstava jednokratnih novčanih pomoći odlučuje ministar na prijedlog komisije.

(2) Tehničke poslove obrade zahtjeva za ostvarivanje prava jednokratnih novčanih pomoći iz člana 3. tačka a), b), c), d), e) i f) ovog pravilnika obavlja Stručna služba u Sektoru za boračko - invalidsku zaštitu.

III - UVJETI I KRITERIJI ZA OSTVARIVANJE PRAVA

Član 8.

(Uvjeti za plaćanje troškova vanrednog školovanja)

Opći uvjeti za ostvarivanje jednokratne novčane pomoći za plaćanje troškova vanrednog školovanja su da je podnosilac zahtjeva lice iz člana 1. Zakona koji ima prebivalište-boravište na području Kantona Sarajevo najmanje 10 godina neprekidno do dana objave javnog poziva za ostvarivanje ovog prava.

Član 9.

(Posebni uvjeti za plaćanje troškova polaganja dopunskih i razrednih ispita)

(1) Jednokratna pomoć za plaćanje troškova polaganja dopunskih i razrednih ispita može se dodijeliti jednom i u visini punog iznosa troškova polaganja dopunskih i razrednih ispita, pod uslovom da se školovanjem stiče prvo zanimanje nakon završene osnovne škole.

(2) Jednokratna novčana pomoć se izuzetno može dodijeliti i ukoliko se školovanjem ne stiče prvo zanimanje, pod uvjetima:

a) da se radi o mogućnosti lakšeg zapošljavanja lica iz člana 1. Zakona koji sa postojećom kvalifikacijom ne mogu naći posao;

b) da je prekvalifikacija uvjet za ostanak na radnom mjestu za podnosioca zahtjeva ukoliko je zaposlen o čemu podnosilac zahtjeva dostavlja ovjerenu pismenu potvrdu poslodavca. Pored navedenog podnosilac zahtjeva dostavlja potvrdu od poslodavca da će ga po završetku prekvalifikacije rasporediti na odgovarajuće radno mjesto u skladu sa stečenom stručnom spremom.

(3) Jednokratna pomoć za plaćanje troškova polaganja dopunskih i razrednih ispita može se dodijeliti prvenstveno nezaposlenim i licima čija ukupna primanja porodičnog domaćinstva, uključujući i primanja po osnovu boračko-invalidske zaštite, ne prelaze iznos 70% od prosječne plaće ostvarene u Kantonu u prethodnoj kalendarskoj godini (u daljnjem tekstu: prosječna plaća).

(4) Izuzetno ovaj vid pomoći se može dodijeliti u iznosu do 60% od cijene troškova školovanja iz računa ili predračuna obrazovne ustanove i licima čija primanja prelaze utvrđeni materijalni cenzus ukoliko nakon rješavanja svih pristiglih zahtjeva koji ispunjavaju uvjete iz prethodnog stava, ostane neutrošenih budžetskih sredstava.

(5) Ovaj vid pomoći se može dodijeliti u iznosu do 60% od cijene troškova školovanja iz računa ili predračuna obrazovne ustanove licima čija primanja prelaze utvrđeni materijalni cenzus i kojima školovanje nije uvjet ostanka na radnom mjestu, ukoliko nakon rješavanja svih pristiglih zahtjeva koji ispunjavaju uvjete iz prethodnog stava, preostane budžetskih sredstava na namjenskoj budžetskoj poziciji.

Član 10. **(Kriteriji za plaćanje troškova vanrednog školovanja)**

Kriteriji za ostvarivanje jednokratnih pomoći za plaćanje troškova vanrednog školovanja su:

- a) pripadnost kategoriji lica iz člana 1. Zakona o dopunskim pravima boraca branitelja Bosne i Hercegovine;
- b) nezaposlenost ili mogućnost lakšeg zapošljavanja podnosioca zahtjeva;
- c) ukupna novčana primanja porodičnog domaćinstva uključujući i primanja po osnovu socijalne i boračko-invalidske zaštite;
- d) prebivalište-boravište na području Kantona Sarajevo;
- e) veći broj članova porodičnog domaćinstva;
- f) ukupni porodični standard;
- g) da je školska ustanova sa sjedištem na području Kantona Sarajevo.

Član 11. **(Posebni uvjeti za plaćanje troškova vanrednog, redovnog samofinansirajućeg i paralelnog studija na višim i visokoškolskim obrazovnim ustanovama)**

(1) U skladu sa raspoloživim finansijskim sredstvima lica iz člana 1. Zakona mogu ostvariti pravo na dodjelu jednokratne novčane pomoći za plaćanje troškova vanrednog, redovnog samofinansirajućeg i paralelnog studija na višim i visokoškolskim obrazovnim ustanovama pod slijedećim uvjetima:

- a) da ima odobrenih finansijskih sredstava za ovu namjenu;
- b) da podnosilac zahtjeva nije zaposlen i nema drugih prihoda, kao ni članovi njegovog porodičnog domaćinstva koji bi omogućili samofinansiranje školovanja;
- c) da ukoliko je podnosilac zahtjeva zaposlen, njegova i ukupna primanja članova porodičnog domaćinstva ne prelaze iznos 70% od prosječne plaće;
- d) da podnosilac zahtjeva nije do sada dobio jednokratnu novčanu pomoć od ovog ministarstva za plaćanje troškova školovanja;
- e) da podnosilac zahtjeva nije stipendista i da nije do sada primio niti prima bilo kakvu finansijsku pomoć za traženo školovanje;

f) da podnosilac zahtjeva ne obnavlja godinu-upis;

g) da se radi o mogućnosti lakšeg zapošljavanja lica iz člana 1. Zakona koji sa postojećom kvalifikacijom ne mogu naći posao;

h) da je završetak studija uvjet za ostanak na radnom mjestu za podnosioca zahtjeva ukoliko je zaposlen o čemu podnosilac zahtjeva dostavlja ovjerenu pismenu potvrdu poslodavca. Pored navedenog podnosilac zahtjeva dostavlja potvrdu od poslodavca da će ga po završetku studija rasporediti na odgovarajuće radno mjesto u skladu sa stečenom stručnom spremom;

i) da je viša, odnosno visokoškolska ustanova sa sjedištem na području Kantona Sarajevo.

(2) Jednokratna pomoć za plaćanje troškova vanrednog, redovnog samofinansirajućeg i paralelnog studija na višim i visokoškolskim obrazovnim ustanovama može se dodijeliti prvenstveno nezaposlenim i licima čija ukupna primanja porodičnog domaćinstva, uključujući i primanja po osnovu boračko-invalidske zaštite, ne prelaze iznos 70% od prosječne plaće.

(3) Ovaj vid pomoći se može dodijeliti licima čija primanja prelaze utvrđeni materijalni cenzus i kojima školovanje nije uvjet ostanka na radnom mjestu, ukoliko nakon rješavanja svih pristiglih zahtjeva koji ispunjavaju uvjete iz prethodnog stava, preostane budžetskih sredstava na namjenskoj budžetskoj poziciji.

Član 12.

(Izuzetak u ostvarivanju prava na plaćanje troškova vanrednog, redovnog samofinansirajućeg i paralelnog studija na višim i visokoškolskim obrazovnim ustanovama)

(1) Jednokratna pomoć za plaćanje troškova vanrednog, redovnog samofinansirajućeg i paralelnog studija može se, u pravilu dodijeliti samo jednom u toku školovanja i u maksimalnoj visini iznosa troškova jedne godine školovanja na višoj ili visokoj obrazovnoj ustanovi, a izuzetno u socijalno opravdanim slučajevima i više puta.

Član 13.

(Obavezna dokumentacija za dodjelu jednokratne pomoći za plaćanje troškova vanrednog školovanja)

(1) Obavezna dokumentacija koju dostavljaju svi podnosioci zahtjeva za dodjelu jednokratne pomoći za plaćanje troškova vanrednog školovanja:

a) dokaz da je lice iz člana 1. Zakona (uvjerenje o vremenu provedenom u OS RBiH, rješenje o ličnoj invalidnini, rješenje o porodičnoj invalidnini, dokaz za nosioce najviših ratnih priznanja);

b) uvjerenje o kretanju za podnosioca zahtjeva;

c) uvjerenje Službe za zapošljavanje ukoliko je podnosilac zahtjeva nezaposlen, kao i za nezaposlene članove domaćinstva;

d) kućnu listu;

e) potvrdu obrazovne ustanove iz koje je vidljivo da je podnosilac zahtjeva upisan na traženo školovanje;

f) račun ili predračun iz kojeg će biti vidljiva specifikacija usluga i cijena troškova školovanja;

g) potvrdu da podnosilac zahtjeva ne obnavlja upis-godinu;

h) izjavu da do sada podnosilac zahtjeva nije dobio novčanu pomoć ili primao stipendiju od ovog Ministarstva, nekog drugog organa ili institucije za školovanje za koje se traži pomoć;

i) za zaposlene dokaz da im je traženo školovanje-sticanje naučnog zvanja uvjet za ostanak na radnom mjestu (ovjerena potvrda poslodavca);

j) za zaposlene dokaz da će ih poslodavac rasporediti na odgovarajuće radno mjesto nakon sticanja odgovarajuće stručne spreme-naučnog zvanja (ovjerena potvrda poslodavca);

k) dokaze o ukupnim mjesečnim prihodima-primanjima podnosioca zahtjeva i članova njegovog porodičnog domaćinstva po osnovu radnog odnosa, boračko-invalidske zaštite, penzije, samostalne djelatnosti i drugih osnova.

Kao dokazi dostavljaju se ovjerene fotokopije originalnih traženih dokumenata.

(2) Podnosilac zahtjeva može pored navedene dokumentacije, uz zahtjev priložiti i ostale dokumente-isprave koji dokazuju njegov težak socijalni status, a koji mogu biti od značaja za donošenje odluke po zahtjevu.

Član 14.

(Posebni uvjeti za plaćanje troškova postdiplomskog studija i odbrane doktorske disertacije)

(1) U skladu sa raspoloživim finansijskim sredstvima lica iz člana 1. Zakona mogu ostvariti pravo na dodjelu jednokratne novčane pomoći za plaćanje troškova postdiplomskog studija i troškova odbrane doktorske disertacije pod slijedećim uvjetima:

a) da ima odobrenih finansijskih sredstava za ovu namjenu;

b) da podnosilac zahtjeva nije zaposlen i nema drugih prihoda, kao ni članovi njegovog porodičnog domaćinstva koji bi omogućili samofinansiranje školovanja;

c) da ukoliko je podnosilac zahtjeva zaposlen, njegova i ukupna primanja članova porodičnog domaćinstva ne prelaze visinu 70% od prosječne plaće;

d) da podnosilac zahtjeva nije do sada dobio jednokratnu novčanu pomoć od ovog Ministarstva za plaćanje troškova školovanja;

e) da podnosilac zahtjeva nije stipendista i da nije do sada primio niti prima bilo kakvu finansijsku pomoć za traženo školovanje;

f) da se radi o mogućnosti lakšeg zapošljavanja lica iz člana 1. Zakona koji sa postojećom kvalifikacijom ne mogu naći posao;

g) da je završetak postdiplomskog studija ili odbrane doktorske disertacije uvjet za ostanak na radnom mjestu za podnosioca zahtjeva ukoliko je zaposlen o čemu podnosilac zahtjeva dostavlja ovjerenu pismenu potvrdu poslodavca. Pored navedenog podnosilac zahtjeva dostavlja potvrdu od poslodavca da će ga po završetku postdiplomskog studija odnosno doktorske disertacije rasporediti na odgovarajuće radno mjesto u skladu sa stečenim naučnim zvanjem;

h) da je visokoškolska ustanova sa sjedištem na području Kantona Sarajevo.

(2) Jednokratna pomoć za plaćanje troškova postdiplomskog studija i troškova odbrane doktorske disertacije može se dodijeliti prvenstveno nezaposlenim i licima čija ukupna primanja porodičnog domaćinstva, uključujući i primanja po osnovu boračko invalidske zaštite, ne prelaze iznos 70% od prosječne plaće.

(3) Ovaj vid pomoći se može dodijeliti licima čija primanja prelaze utvrđeni materijalni cenzus i kojima školovanje nije uvjet ostanka na radnom mjestu, ukoliko nakon rješavanja svih pristiglih zahtjeva koji ispunjavaju uvjete iz prethodnog stava, preostane budžetskih sredstava na namjenskoj budžetskoj poziciji.

Član 15.

(Izuzetak u ostvarivanju prava na plaćanje troškova postdiplomskog studija i odbrane doktorske disertacije)

(1) Jednokratna novčana pomoć za plaćanje troškova postdiplomskog studija i odbrane doktorske disertacije može se u pravilu, dodijeliti samo jednom u toku školovanja i u maksimalnoj visini iznosa troškova jednog semestra, odnosno 1/3 troškova odbrane magistarskog rada i doktorske disertacije, a izuzetno licima koja postižu vanredne rezultate u školovanju i socijalno opravdanim slučajevima i više puta a maksimalno do visine ukupnih troškova.

(2) Jednokratna novčana pomoć za plaćanje troškova postdiplomskog studija i odbrane doktorske disertacije, pod uvjetima iz člana 14. ovog pravilnika, može se dodijeliti i članovima porodica šehida-poginulih boraca i ratnih vojnih invalida kojima je prestalo navedeno svojstvo, odnosno licima koja su izgubila pravo na ličnu i porodičnu invalidninu.

Član 16.

(Prednost pri rješavanju zahtjeva)

Prednost pri rješavanju zahtjeva iz člana 3. tačka a) ovog pravilnika, pod jednakim uvjetima, imaju nezaposlena lica iz člana 1. Zakona, a u okviru ovih kategorija, lica sa težim socijalnim statusom.

Član 17.

(Refundacija troškova školovanja)

Lica iz člana 1. Zakona koja su izvršila plaćanje troškova školovanja vlastitim sredstvima ne mogu ostvariti pravo na jednokratnu novčanu pomoć za troškove školovanja putem

refundacije, niti Ministarstvo može preuzeti troškove školovanja nastale za prethodne godine školovanja podnosioca zahtjeva.

Član 18.

(Uvjeti za jednokratnu pomoć u vidu prehrambenih i higijenskih artikala)

(1) Lica iz člana 1. Zakona mogu ostvariti jednokratnu pomoć u vidu prehrambenih i higijenskih artikala koja imaju prebivalište-boravište na području Kantona Sarajevo najmanje 10 godina neprekidno do dana objave javnog poziva za ostvarivanje ovog prava, a nalaze se u stanju socijalne potrebe.

(2) Ovaj vid jednokratne pomoći može se dodijeliti licima iz stava (1) ovog člana težeg imovnog stanja a čiji ukupni mjesečni prihodi, uključujući i prihode po osnovu boračko-invalidske zaštite, po članu domaćinstva ne prelaze iznos 17% od prosječne plaće.

(3) Visinu vrijednosti jednokratne novčane pomoći u vidu prehrambenih i higijenskih artikala ministar svojom odlukom utvrđuje svake godine, imajući u vidu porast troškova života u prethodnoj godini i raspoloživa budžetska sredstva za ove namjene.

Član 19.

(Odobranje jednokratne pomoći u vidu prehrambenih i higijenskih artikala)

Jednokratna pomoć u vidu prehrambenih i higijenskih artikala može se odobriti podnosiocu zahtjeva samo jednom godišnje, a izuzetno, prema procjeni stanja, u socijalno opravdanim slučajevima dva puta.

Član 20.

(Obavezna dokumentacija za dodjelu jednokratne pomoći u vidu prehrambenih i higijenskih artikala)

Obavezna dokumentacija koju dostavljaju svi podnosioci zahtjeva za dodjelu prehrambenih i higijenskih artikala:

a) dokaz da je lice iz člana 1. Zakona (uvjerenje o vremenu provedenom u OS R BiH, rješenje o ličnoj invalidnini, uvjerenje da je i dalje korisnik lične invalidnine, rješenje o porodičnoj invalidnini, uvjerenje da je i dalje korisnik porodične invalidnine);

b) uvjerenje o kretanju za podnosioca zahtjeva;

c) uvjerenje Službe za zapošljavanje ukoliko je podnosilac zahtjeva nezaposlen kao i za nezaposlene članove domaćinstva;

d) kućnu listu;

e) dokaze o ukupnim mjesečnim primanjima podnosioca zahtjeva i članova njegovog porodičnog domaćinstva po osnovu: radnog odnosa, boračko-invalidske zaštite, penzije, samostalne djelatnosti i drugih osnova;

f) uvjerenje da podnosilac zahtjeva, kao ni njegovi punoljetni članovi domaćinstva nisu evidentirani kao porezni obveznici i da nemaju duga po osnovu javnih prihoda.

Član 21.

(Kriteriji za dodjelu za jednokratne pomoći u vidu prehrambenih i higijenskih artikala)

(1) Kriteriji za dodjelu prehrambenih i higijenskih artikala su:

- a) pripadnost kategoriji lica iz člana 1. Zakona težeg imovnog stanja čiji ukupni prihod ne prelazi 17% od prosječne plaće po članu domaćinstva;
- b) teže zdravstveno stanje podnosioca zahtjeva ili članova njegovog porodičnog domaćinstva;
- c) veći broj članova porodičnog domaćinstva.

(2) Prioritet za ostvarivanje prava na dodjelu prehrambenih i higijenskih artikala pod jednakim uvjetima imaju podnosioci zahtjeva koji u predhodne dvije godine nisu bili korisnici ovog prava, kao i drugih prava iz segmenta socijalne zaštite.

Član 22.

(Opći uvjeti za ostvarivanje jednokratne novčane pomoći za rješavanje drugih socijalnih potreba)

Opći uvjeti za ostvarivanje jednokratne novčane pomoći za rješavanje drugih socijalnih potreba su da je podnositelj zahtjeva lice iz člana 1. Zakona koji ima prebivalište-boravište na području Kantona Sarajevo najmanje 10 godina neprekidno do dana objave javnog poziva za ostvarivanje ovog prava.

Član 23.

(Posebni uvjeti za ostvarivanje jednokratne novčane pomoći za rješavanje drugih socijalnih potreba)

(1) Jednokratna novčanu pomoć za rješavanje drugih socijalnih potreba, po ukazanoj potrebi može se dodjeljivati licima iz člana 1. Zakona koji se nalaze u stanju socijalne potrebe čiji ukupni mjesečni prihodi uključujući i prihode po osnovu boračko-invalidske zaštite ne prelaze iznos 17% od prosječne plaće, teže bolesti, elementarne nepogode i ostalih slučajeva teških socijalno-ekonomskih situacija koji mogu dovesti do ugrožavanja osnovnih životnih potreba i u drugim sličnim urgentnim slučajevima.

(2) Jednokratna novčana pomoć za rješavanje drugih socijalnih potreba može se dodijeliti članovima porodica šehida i poginulih boraca, nestalih i umrlih boraca-branitelja, težim ratnim vojnim invalidima, nosiocima najvišeg ratnog priznanja koji su dali izuzetan doprinos u odbrani Bosne i Hercegovine od agresije, kao i podnosiocima zahtjeva težeg imovnog stanja u čijoj je porodici bilo više šehida-poginulih boraca ili branitelja ili više boraca-branitelja neovisno od uvjeta iz stava (1) ovog člana.

(3) Za potrebe odlučivanja o dodjeli jednokratne novčane pomoći, ministar formira Komisiju, čiji zadatak je da ocijeni da li podnositelj zahtjeva ispunjava uvjete iz propisanih kriterija za dodjelu ove vrste pomoći, te da predloži ministru, visinu iznosa jednokratne novčane pomoći.

Član 24.

(Kriteriji za ostvarivanje jednokratne novčane pomoći za rješavanje drugih socijalnih potreba)

(1) Jednokratna novčana pomoć može se dodijeliti licima u skladu sa ovim pravilnikom koji imaju prebivalište ili boravište na području Kantona Sarajevo najmanje 10 godina neprekidno do dana objave javnog poziva za ostvarivanje ovog prava, koji zbog trenutnih okolnosti (npr. bolest, smrt člana porodice, dugotrajno liječenje, nabavka skupih lijekova, elementarne nepogode ili druge životne nevolje), a prema ocjeni Stručne službe ispunjavaju sve uvjete iz Zakona i ovog pravilnika.

(2) Stručna služba nakon ocjene da su ispunjeni uvjeti iz stava (1) ovog člana predmet upućuje Komisiji za dodjelu jednokratnih novčanih pomoći za rješavanje drugih socijalnih potreba, koju imenuje ministar, a koja u svakom konkretnom slučaju cijeni potrebu za dodjelom ove vrste pomoći i daje prijedlog ministru o visini iznosa jednokratnih novčanih pomoći.

(3) Kriteriji za ostvarivanje prava na dodjelu jednokratne novčane pomoći su prvenstveno:

a) teže bolesti lica iz ovog pravilnika i teže bolesti članova porodice koji žive u zajedničkom domaćinstvu;

b) elementarne nepogode (požar, poplava, potres, udar groma i sl.);

c) ostali slučajevi teških socijalno-ekonomskih situacija koje ugrožavaju osnovne životne potrebe.

(4) Razrada kriterija iz stava (3) ovog člana po iznosima visine jednokratne novčane pomoći:

a) teže bolesti lica iz ovog pravilnika i teže bolesti članova porodice koji žive u zajedničkom domaćinstvu su:

1) maligna oboljenja do 5.000,00 KM;

2) endemska nefropatija do 5.000,00 KM;

3) akutna tuberkuloza do 2.000,00 KM;

4) infarkt (moždani, srčani) do 2.000,00 KM;

5) autoimune i sistemske bolesti: rheumathoid arthritis, vegenerova granuloamatoza, sjegrenov sindrom, sclerodermia, sistemski lupus erythematodes, bechterova bolest, hronične intersticijalne eozinofilne pneumoniae i sl. do 2.000,00 KM;

6) terminalna renalna insuficijencija na hemodijalizi do 2.000,00 KM;

7) povrede mozga sa senzomotoričnim ispadima oduzetošću i nepokretnošću do 2.000,00 KM;

8) stanje poslije hirurškog zahvata srca do 1.500,00 KM;

9) birgerova bolest do 1.500,00 KM;

10) sva degenerativna oboljenja centralnog nervnog sistema do 1.000,00 KM;

- 11) oboljenje mišićnog sistema i paralize do 1.000,00 KM;
- 12) epilepsia do 1.000,00 KM;
- 13) povrede koje dovode do ukočenosti zglobova i amputacije ekstremiteta do 1.000,00 KM;
- 14) srčane mane urođene i stečene do 1.000,00 KM;
- 15) ciroza jetre do 1.000,00 KM;
- 16) ostale bolesti do 500,00 KM.

b) nabavka skupih lijekova i ortopedskih pomagala do 1.500,00 KM;

c) elementarne nepogode

- 1) požar do 2.000,00 KM;
- 2) poplava do 2.000,00 KM;
- 3) potres do 1.000,00 KM;
- 4) udar groma do 1.000,00 KM;
- 5) ostale prirodne nepogode do 500,00 KM.

d) ostali slučajevi teških socijalno-ekonomskih situacija (nezaposlenost, teška neimaština i dr.) koje ugrožavaju osnovne životne potrebe do 500,00 KM;

e) sve navedene slučajeve iz kriterija a), b), c) i d) ukoliko za to postoji posebna potreba, a prema ocjeni Komisije za dodjelu jednokratnih novčanih pomoći, mogu se odobriti i drugi iznosi jednokratnih pomoći sve do propisane maksimalne visine od deset prosječnih plaća.

(5) Prilikom primjene kriterija iz stava (3) i (4) ovog člana uzet će se u obzir sljedeće:

- a) vrsta, težina konkretnog socijalnog problema i potreba hitnosti njegovog rješavanja;
- b) radni status i ukupna primanja radno sposobnih članova porodičnog domaćinstva uključujući i primanja po osnovu davanja iz oblasti boračko-invalidske i socijalne zaštite;
- c) stambena situacija podnosioca zahtjeva;
- d) broj izdržavanih nezaposlenih i bolesnih članova porodičnog domaćinstva;
- e) težina i vrsta oboljenja;
- f) vrsta i cijena koštanja liječenja i potrebnih lijekova;
- g) procjena oštećenja objekta usljed elementarne nepogode izvršena od strane nadležnih

institucija;

h) drugi faktori koji prema ocjeni Stručne službe i Komisije za dodjelu jednokratnih novčanih pomoći za rješavanje drugih socijalnih potreba ukazuju na nemogućnost djelimičnog ili cjelovitog zadovoljenja osnovnih životnih potreba.

(6) Prioritet za ostvarivanje jednokratne novčane pomoći pod jednakim uvjetima imaju podnosioci zahtjeva koji ranije nisu bili korisnici ovog prava, kao i drugih prava iz segmenta socijalne zaštite.

(7) Ukoliko se po zahtjevu ne ostvari pravo na dodjelu jednokratne novčane pomoći za rješavanje drugih socijalnih potreba podnosioca zahtjeva, Ministarstvo je dužno uputiti rješenje na koje se može podnijeti prigovor ministru. Rješenje po prigovoru je konačno.

Član 25.

(Obavezna dokumentacija za ostvarivanje jednokratne novčane pomoći za rješavanje drugih socijalnih potreba)

(1) Obavezna dokumentacija koju dostavljaju podnosioci zahtjeva za dodjelu jednokratne novčane pomoći za rješavanje drugih socijalnih potreba su:

a) dokaz da je lice iz člana 1. Zakona (uvjerenje o vremenu provedenom u OS R BiH, rješenje o ličnoj invalidnini, uvjerenje da je i dalje korisnik lične invalidnine, rješenje o porodičnoj invalidnini i uvjerenje da je i dalje korisnik porodične invalidnine);

b) uvjerenje o kretanju za podnosioca zahtjeva;

c) uvjerenje Službe za zapošljavanje ukoliko je podnosilac zahtjeva nezaposlen, kao i za njegove članove porodičnog domaćinstva ukoliko su nezaposleni;

d) uvjerenje da podnosilac zahtjeva, kao ni njegovi punoljetni članovi domaćinstva da nemaju duga po osnovu javnih prihoda;

e) kućnu listu;

f) dokaze o ukupnim mjesečnim prihodima-primanjima podnosioca zahtjeva i članova njegovog porodičnog domaćinstva po osnovu: radnog odnosa, boračko-invalidske zaštite, penzije, samostalne djelatnosti i drugih osnova;

g) medicinska dokumentacija za podnosioca zahtjeva i članova njegovog porodičnog domaćinstva;

h) rodni list (trajnog karaktera) za podnosioca zahtjeva koji živi sam, a za podnosice zahtjeva koji su bili u bračnoj zajednici presudu o razvodu braka.

Član 26.

(Visina jednokratne novčane pomoći za socijalne potrebe)

Jednokratna novčana pomoć za rješavanje drugih socijalnih potreba dodjeljuje se prema kriterijima iz člana 24. ovog pravilnika, a ista se može odobriti maksimalno do visine deset prosječnih plaća.

Član 27.

(Uvjeti za ostvarivanje jednokratne novčane pomoći za plaćanje troškova stanarine)

Uvjeti za ostvarivanje jednokratne novčane pomoći za plaćanje troškova stanarine su da je podnosilac zahtjeva lice iz člana 1. Zakona koje ima prebivalište-boravište na području Kantona Sarajevo najmanje 10 godina neprekidno do dana objave javnog poziva za ostvarivanje ovog prava.

Član 28.

(Posebni uvjeti za ostvarivanje jednokratne novčane pomoći za plaćanje troškova stanarine)

(1) Jednokratna novčana pomoć za plaćanje troškova stanarine se može po ukazanoj potrebi dodjeljivati licima iz člana 1. Zakona koji su bez ikakvih prihoda, odnosno koji se nalaze u stanju socijalne potrebe, pod uvjetom da se rješavanje ovih potreba ne može ostvariti kroz druge programe i projekte ovog Ministarstva vezane za pružanje pomoći borcima-braniteljima Bosne i Hercegovine u rješavanju stambenog pitanja čiji ukupni mjesečni prihodi, uključujući i prihode po osnovu boračko-invalidske zaštite ne prelaze 115,00 KM po članu domaćinstva + 300,00 KM za režijske i druge troškove koji bi podrazumijevali plaćanje stanarine.

(2) Jednokratna novčana pomoć za plaćanje troškova stanarine može se dodijeliti članovima porodica šehida i poginulih boraca, nestalih i umrlih boraca-branitelja, težim ratnim vojnim invalidima, nosiocima najvišeg ratnog priznanja koji su dali izuzetan doprinos u odbrani Bosne i Hercegovine od agresije, kao i podnosiocima zahtjeva težeg imovnog stanja u čijoj je porodici bilo više šehida-poginulih boraca ili branitelja ili više boraca-branitelja neovisno od uvjeta iz prethodnog stava ovog člana, a što će u svakom pojedinačnom slučaju cijeniti ministar na prijedlog pomoćnika ministra.

Član 29.

(Kriteriji za ostvarivanje jednokratne novčane pomoći za plaćanje troškova stanarine)

Kriteriji za ostvarivanje jednokratne novčane pomoći za plaćanje troškova stanarine su:

- a) da podnosilac zahtjeva kao i njegovi članovi domaćinstva nemaju na drugi način riješeno stambeno pitanje na području Kantona Sarajevo;
- b) da ima ovjeren ugovor o podstanarstvu;
- c) da ima odobrenih finansijskih sredstava za ovu namjenu u budžetu Kantona Sarajevo.

Član 30.

(Visina jednokratne novčane pomoći za plaćanje troškova stanarine)

(1) Visina odobrenog iznosa plaćanja troškova stanarine utvrđuje se prema broju članova porodičnog domaćinstva i to:

- a) za podnosioca zahtjeva - samac - 200,00 KM mjesečno;

b) za podnosioca zahtjeva sa jednim članom porodičnog domaćinstva - 250,00 KM mjesečno;

c) za podnosioca zahtjeva sa dva ili više članova porodičnog domaćinstva - 300,00 KM mjesečno.

(2) Jednokratna novčana pomoć za plaćanje troškova stanarine podnosiocu zahtjeva može se odobriti za šest mjeseci, a izuzetno, prema procjeni stanja, u socijalno opravdanim slučajevima u maksimalnom trajanju od 12 mjeseci.

Član 31.

(Obavezna dokumentacija za plaćanje troškova stanarine)

Obavezna dokumentacija koju dostavljaju svi podnosioci zahtjeva za dodjelu jednokratne novčane pomoći za plaćanje troškova stanarine su:

a) dokaz da je lice iz člana 1. Zakona (uvjerenje o vremenu provedenom u OS R BiH, rješenje o ličnoj invalidnini, uvjerenje da je i dalje korisnik lične invalidnine, rješenje o porodičnoj invalidnini, uvjerenje da je i dalje korisnik porodične invalidnine);

b) kućnu listu;

c) uvjerenje o kretanju za podnosioca zahtjeva;

d) uvjerenje Službe za zapošljavanje ukoliko je podnosilac zahtjeva, kao i njegovi članovi porodičnog domaćinstva nezaposleni;

e) uvjerenje da podnosilac zahtjeva, kao ni njegovi punoljetni članovi domaćinstva nisu evidentirani kao porezni obveznici i da nemaju duga po osnovu javnih prihoda;

f) dokaze o ukupnim mjesečnim prihodima-primanjima podnosioca zahtjeva i članova njegovog porodičnog domaćinstva po osnovu: radnog odnosa, boračko-invalidske zaštite, penzije, samostalne djelatnosti i drugih osnova;

g) ovjeren ugovor o podstanarstvu od strane nadležnog organa općine i poreske uprave;

h) izjavu da podnosilac zahtjeva plaća stanarinu te da ne posjeduje stambenu jedinicu na području Kantona Sarajevo;

i) potvrdu banke o otvorenom računu.

Član 32.

(Uvjeti za pružanje jednokratne pomoći u plaćanju troškova u procesu odbrane)

(1) Skupština Kantona Sarajevo dala je punu podršku Ministarstvu, da u skladu sa zakonskim ovlaštenjima i svim drugim mogućnostima, a u okviru predviđenih sredstava za finansiranje pravne pomoći u korist branilaca BiH, u Budžetu Kantona Sarajevo, pruži sve vrste pomoći osumnjičenim i optuženim bivšim pripadnicima Armije BiH u predmetima ratnih zločina do pravosnažnosti presude, kao i članovima njihovih porodica.

(2) Jednokratna pomoć u plaćanju troškova u procesu odbrane može se dodjeljivati bivšim pripadnicima Armije RBiH i MUP RBiH kao i članovima njihovih porodica koji su učestvovali u odbrani suvereniteta i cjelovitosti Bosne i Hercegovine a koji su optuženi u predmetima ratnih zločina do pravosnažnosti presude.

(3) O jednokratnoj pomoći u plaćanju troškova u procesu odbrane odlučivat će se nakon podnijetog zahtjeva sa odgovarajućom dokumentacijom, a ista se može dodijeliti i članovima njihovog porodičnog domaćinstva, koji se nalaze u stanju socijalne potrebe, teže bolesti, i ostalih slučajeva teških socijalno-ekonomskih situacija, koji mogu dovesti do ugrožavanja osnovnih životnih potreba.

Član 33.

(Postupak za ostvarivanje jednokratne pomoći u plaćanju troškova u procesu odbrane)

(1) Optuženo ili osumnjičeno lice podnosi zahtjev za odobravanje pomoći na predviđenom obrascu uz dokumentaciju:

a) dokaz da je lice iz člana 1. Zakona (uvjerenje o vremenu provedenom u OS R BiH, rješenje o ličnoj invalidnini, rješenje o porodičnoj invalidnini) izuzev za lica čiji ratni angažman je opće poznat;

b) dokaz o pokretanju istrage, podizanju ili potvrđivanju optužnice i drugo (rješenje optužnica i drugo);

c) dokaz o troškovima odbrane (ugovor sa advokatom i drugo);

d) prijava mjesta boravka-prebivališta;

e) medicinska dokumentacija o bolesti za podnosioca zahtjeva i njegove članove porodičnog domaćinstva;

f) kućnu listu;

g) dokaze o ukupnim mjesečnim primanjima podnosioca zahtjeva i članova njegovog porodičnog domaćinstva po osnovu: radnog odnosa, boračko-invalidske zaštite, penzije, samostalne djelatnosti i drugih osnova, za nezaposlena lica uvjerenje Službe za zapošljavanje;

h) izjava o osiguranim sredstvima iz drugih izvora.

(2) Za potrebe odlučivanja o dodjeli jednokratne pomoći u plaćanju troškova u procesu odbrane, ministar formira posebnu Komisiju, čiji zadatak je da ocijeni da li podnosilac zahtjeva ispunjava uslove za dodjelu ove vrste pomoći, te da predloži ministru, visinu iznosa pomoći uz obrazloženje takvog prijedloga.

(3) Komisija iz prethodnog stava broji najmanje tri člana od čega najmanje jedan član mora biti renomirani advokat/pravnik i najmanje jedan član kandidovan ispred "Koordinacionog odbora boračkih organizacija Kantona Sarajevo".

Član 34.
(Lica koja ne mogu ostvariti jednokratnu pomoć u plaćanju troškova u procesu odbrane)

Pravo na jednokratnu pomoć u plaćanju troškova u procesu odbrane ne mogu ostvariti lica protiv kojih je donesena pravomoćna presuda za počinjene ratne zločine i lica kod kojih su evidentirani podaci iz člana 36. Zakona o pravima branilaca i članova njihovih porodica ("Službene novine Federacije BiH", br. 33/04, 56/05 - Ispravka, 70/07, 9/10 i 90/17).

Član 35.
(Visina jednokratne pomoći u plaćanju troškova u procesu odbrane)

Visina jednokratne pomoći u plaćanju troškova u procesu odbrane se utvrđuje na osnovu dostavljenog zahtjeva (obuhvat optužnice, vrste odgovornosti, zasluga podnosioca zahtjeva, visina troškova i drugo) i ocjene Komisije iz člana 33. stav (2) a prema budžetskim sredstvima predviđenim za ovu namjenu.

Član 36.
(Izvještavanje)

Ministarstvo informiše Vladu Kantona Sarajevo o sredstvima utrošenim za ovu namjenu u okviru godišnjeg izvještaja o radu Ministarstva.

IV – PRAVO NA OBEZBJEĐENJE OGRJEVA

Član 37.
(Uvjet za ostvarivanje prava na obezbjeđenje ogrjeva)

Lica iz člana 1. Zakona mogu ostvariti pravo na obezbjeđenje ogrjeva pod uvjetom da imaju prebivalište - boravište na području Kantona Sarajevo najmanje 10 godina neprekidno do dana objave javnog poziva za ostvarivanje ovog prava.

Član 38.
(Kriteriji za ostvarivanje prava na obezbjeđenje ogrjeva)

(1) Kriteriji za ostvarivanje prava na obezbjeđenje ogrjeva su:

- a) da lica iz člana 1. Zakona isključivo koriste čvrsti ogrjev za zagrijavanje stambenog prostora;
- b) teže imovno stanje podnosioca zahtjeva čiji ukupni prihod ne prelazi 17% od prosječne plaće po članu domaćinstva;
- c) težak zdravstveni položaj podnosioca zahtjeva ili članova njegovog porodičnog domaćinstva;
- d) veći broj članova porodičnog domaćinstva.

(2) Prioritet za ostvarivanje ovog prava pod jednakim uvjetima imaju podnosioci zahtjeva koji u predhodne dvije godine nisu bili korisnici prava na obezbjeđenje ogrjeva, kao i drugih prava

iz segmenta socijalne zaštite.

(3) Porodice šehida i porodice poginulog, umrlog, nestalog branioca imaju mogućnost ostvariti ovo pravo bez obzira na ukupni prihod po članu domaćinstva ukoliko se nalaze u težem zdravstvenom stanju, koje cijeni Komisija za dodjelu jednokratnih novčanih pomoći za rješavanje drugih socijalnih potreba.

Član 39.

(Obavezna dokumentacija za ostvarivanje prava na obezbjeđenje ogrjeva)

Obavezna dokumentacija koju dostavljaju svi podnosioci zahtjeva za ostvarivanje prava na obezbjeđenje ogrjeva:

- a) dokaz da je lice iz člana 1. Zakona (uvjerenje o vremenu provedenom u OS R BiH, rješenje o ličnoj invalidnini, uvjerenje da je i dalje korisnik lične invalidnine, rješenje o porodičnoj invalidnini, uvjerenje da je i dalje korisnik porodične invalidnine);
- b) uvjerenje o kretanju za podnosioca zahtjeva;
- c) uvjerenje Službe za zapošljavanje ukoliko je podnosilac zahtjeva nezaposlen kao i za nezaposlene članove domaćinstva;
- d) kućnu listu;
- e) medicinska dokumentacija o bolesti za podnosioca zahtjeva i njegove članove porodičnog domaćinstva;
- f) dokaze o ukupnim mjesečnim primanjima podnosioca zahtjeva i članova njegovog porodičnog domaćinstva po osnovu: radnog odnosa, boračko-invalidske zaštite, penzije, samostalne djelatnosti i drugih osnova;
- g) uvjerenje da podnosilac zahtjeva, kao ni njegovi punoljetni članovi domaćinstva nisu evidentirani kao porezni obveznici i da nemaju duga po osnovu javnih prihoda;
- h) rodni list (trajnog karaktera) za podnosioca zahtjeva koji živi sam, a za podnosice zahtjeva koji su bili u bračnoj zajednici presudu o razvodu braka.

Član 40.

(Postupak za ostvarivanje prava na obezbjeđenje ogrjeva)

- (1) Postupak za ostvarivanje prava na obezbjeđenje ogrjeva provodi Ministarstvo.
- (2) Za ostvarivanje prava iz člana 37. ovog pravilnika svake godine, saglasno odobrenim budžetskim sredstvima, objavljuje se Javni poziv putem sredstava informisanja.
- (3) Zahtjev za ostvarivanje ovog prava podnosi se u skladu sa rokovima propisanim Javnim pozivom iz stava (2) ovog člana, na posebnom obrascu koji propisuje ministar.
- (4) Nakon provedenog postupka Stručna služba formira listu lica koja ispunjavaju uvjete i listu lica koja ne ispunjavaju uvjete za obezbjeđenje ogrjeva.

(5) Na liste iz stava (4) ovog člana može se podnijeti prigovor ministru. Rješenje po prigovoru je konačno.

V – PRELAZNE I ZAVRŠNE ODREDBE

Član 41. (Prestanak važenja dosadašnjih propisa)

Danom stupanja na snagu ovog pravilnika prestaje da važi Pravilnik za utvrđivanje prava na dodjelu jednokratne novčane pomoći i prava na obezbjeđenje ogrjeva ("Službene novine Kantona Sarajevo" br. 30/09-Prečišćeni tekst, 07/11, 30/13, 14/15 i 15/19).

Član 42. (Stupanje na snagu)

Ovaj Pravilnik stupa na snagu narednog dana od dana objavljivanja u "Službenim novinama Kantona Sarajevo".

Broj 06-02-2548/21
29. januara 2021. godine
Sarajevo

Ministar
Dr. sc. **Omer Osmanović**, s. r.